

Inuit Pisinnatitaaffii pillugit Siunnersuisoqatigiit pillugit Inatsisartut inatsisaat nr. 20, 27. november 2018-imeersoq

Kapitali 1

Suliassat

§ 1. Naalagaaffiit Peqatigiit Parisimi tunngavissaat nunani inuit pisinnatitaaffiinik suliffeqarfinnut atuuttut naapertorlugit Inatsisartut inatsisaata matuma, Inuit Pisinnatitaaffii pillugit Siunnersuisoqatigiit (siunnersuisoqatigiit) sinaakkutissaat aalajangersarpai.

Imm. 2. Inuit Pisinnatitaaffii pillugit Siunnersuisoqatigiit siunnersuisoqatigiiupput arlaannaannulluunniit attuumassuteqanngitsut, Kalaallit Nunaanni inuit pisinnatitaaffii pillugit ataatsimut isigalugu ilisimasanik piginnaasanillu annertusaanermut suleqataasussat.

§ 2. Inuit Pisinnatitaaffii pillugit Siunnersuisoqatigiit suliassaraat Kalaallit Nunaanni inuit pisinnatitaaffiisa siuarsarneqarnissaat illersorneqarnissaallu, inuaqatigiinni kalaallini inuit pisinnatitaaffiisigut unamminartut oqallisiginerisigut aamma Inuttut pisinnatitaaffinnut Institutti ingerlatassanik siunnersuuteqarfigineratigut, assersuutigalugit matumani ilanngullugit:

- 1) Kalaallit Nunaanni inuit pisinnatitaaffiinut pissutsit pillugit nakkutilliinermut nalunaaruteqartarnermullu peqataanerit,
- 2) inuit pisinnatitaaffiinut tunngassuteqartunik misissueqqissaarnerit ilisimatusarnikkullu suliat oqallisigineri,
- 3) inuit pisinnatitaaffii pillugit Inatsisartunik, Naalakkersuisunik oqartussaasunillu allanik aamma namminersorlutik suliaqartunik siunnersuinerit,
- 4) inuit pisinnatitaaffiinik inuaqatigiinni sulianik ataqtigissaarineq taakkununngalu naleqqiullugu ikuunneq,
- 5) inuit pisinnatitaaffiinik ilinniartitsinermik tapersersuineq siuarsaanelu,
- 6) inuit pisinnatitaaffii pillugit paassisutissanik siammarsaanermut peqataaneq,
- 7) Kalaallit Nunaanni inuit pisinnatitaaffiisa patajaallisarneqarnissaat siunertaralugu ingerlatassanik siunnersuuteqarneq, aamma
- 8) Kalaallit Nunaanni inuit pisinnatitaaffiinut tunngassuteqartunik maannamut suliasarsimasut ingerlanerisa nalilersornerat.

Imm. 2. Inuit Pisinnatitaaffii pillugit Siunnersuisoqatigiit Inuttut pisinnatitaaffinnut Instituttip siulersuisuinut ilaasortassamik toqqaassapput.

Kapitali 2

Siunnersuisoqatigiit katitigaanerat, innassuteqaateqarneq, aqunneqarnerat allattoqarnerallu

§ 3. Inuit Pisinnaatitaaffii pillugit Siunnersuisoqatigiit imatut katitigaassapput, isummat innuttaasut soqutigisaqaqatigiiffiini inuit pisinnaatitaaffiinik suliaqartuni atuuttut siunnersuisoqatigiinni takuneqarsinnaassallutik. Taamatuttaaq pisortani oqartussaasut immikkut attuumassuteqartut siunnersuisoqatigiit ataatsimiinnerini peqataatitaqartassapput.

Imm. 2. Tulliullugit taaneqartut Inuit Pisinnaatitaaffii pillugit Siunnersuisoqatigiinni aalajangersimasumik ilaasortaapput:

- 1) Meeqqat Illersuisuat,
- 2) Inuit innarluutillit Illersuisuat, aamma
- 3) Naligiissitaanissamut Siunnersuisoqatigijit siulittaasuat.

Imm. 3. Imm. 2 naapertorlugu aalajangersimasumik ilaasortat, saniatigut, kattuffiit, peqatigiiffiit, suliffeqarfii il.il. inassuteqareernerisigut Inatsisartut Inuit Pisinnaatitaaffii pillugit Siunnersuisoqatigiit ilaasortassaanik 10-nik toqqaassapput. Ilasortanik 10-nik taakkunanna:

- 1) Ilasortaq 1 meeqqat inuuasutullu pillugit NGO-tut sulissuteqartut sinnerlugit peqataatitaassaaq,
- 2) Ilasortaq 1 inuit innarluutillit pillugit NGO-tut sulissuteqartut sinnerlugit peqataatitaassaaq,
- 3) Ilasortaq 1 eqqartuussiviit inatsisitigullu isumannaatsuunissamik suliaqartut sinnerlugit peqataatitaassaaq,
- 4) Ilasortaq 1 ilinniartitaaneq ilisimatusarnerlu sinnerlugit peqataatitaassaaq,
- 5) Ilasortaq 1 nunap inoqqaavisa pisinnaatitaaffiisa iluanni NGO sinnerlugi peqataatitaassaaq, aamma
- 6) Ilasortat allat 5 inuit pisinnaatitaaffii naapertorlugit soqutigisallit sinnerlugit peqataassapput.

§ 4. Ilasortat 10, § 3, imm. 3 naapertorlugu toqqakkat, ukiuni sisamani atuuttussatut toq-qagaassapput, taamaalillunilu ilaasortat tallimat ukioq allortarlugu toqqrneqartassallutik.

Imm. 2. Imm. 1 naapertorlugu Inuit Pisinnaatitaaffii pillugit Siunnersuisoqatigiinni ilasortaq piffissaq sioqqullugu ilaasortajunnaassappat, Inatsisartut ilaasortassatut inassutigineqartut akornannit ilaasortassamik nutaamik toqqaassapput, taannalu ilaasortap ilaasortajunnaartup toqqagaaffiata sinnerani atuutissaaq.

Imm. 3. Ilasortat § 3, imm. 3 aamma § 4, imm. 2 malillugit toqqrneqartut ataasiarlutik toqqagaqqissinnaapput. Tamatuma kingorna minnerpaamik ukiut sisamat qaangiunneranni aatsaat toqqaqqinnejarsinnaapput.

§ 5. Soqutigisaqaqatigiit ataani taaneqartut Inuit Pisinnaatitaaffii pillugit Siunnersuisoqatigiit ataatsimiinnerinut peqataasinnaatitaapput, oqaaseqarsinnaatitaallutik kisiannili taaseqataasinnaatitaanatik:

- 1) Inuttut pisinnaatitaaffinnut Instituti
- 2) Naalakkersuisoqarfik akisussaasoq
- 3) Kommunit ataatsimoorlutik peqataatitaat 1

Imm. 2. Inuit Pisinnaatitaaffii pillugit Siunnersuisoqatigiit aalajangiusinnaavaat peqatigiiffiit, kattuffiit aamma oqartussat il.il. amerlanerit Siunnersuisoqatigiit ataatsimiinnerinut oqaaseqarsinnaatitaallutik imaluunniit oqaaseqarsinnaatitaanatik peqataasinnaasut.

Imm. 3. Inuit Pisinnatitaaffii pillugit Siunnersuisoqatigiit aalajangiussinnaavaat ataatsimiinnitik tamanut ammasuussasut.

Inassuteqaateqartarneq

§ 6. Siunnersuisoqatigiit nuna tamakkerlugu tusagassiutitigut nalunaarutigisassavaat aamma Siunnersuisoqatigiit nittartagaatigut tamanut saqqummiullugu, kattuffiit, peqatigiiffiit suliffeqarfiiit il.il. Inuit Pisinnatitaaffii pillugit Siunnersuisoqatigiinnut ilaasortassanik inassuteqaateqarsinnaasut. § 3, imm. 3 naapertorlugu, nalunaaruteqarneq pisassaaq Siunnersuisoqatigiit ilaasortassaannik toqqaanissaq kingusinnerpaamik qaammatinik 6-nik sioqquillugu,

Imm. 2. Kattuffiit, peqatigiiffiit, suliffeqarfiiit il.il. inassuteqaateqarsinnaasut, Inuit Pisinnatitaaffii pillugit Siunnersuisoqatigiinnut ilaasortassat marluk angullugit inassutigisinnaavaat. Sapinngisaq naapertorlugu arnamik angummillu inassuteqaateqartoqartassaaq.

Imm. 3. Inassuteqaatit Inuit Pisinnatitaaffii pillugit Siunnersuisoqatigiinnut nassiunneqartassapput, taakkulu toqqagassatut inassutigineqartut allassimaffiat, ilaasortassatut inassutigineqartut pillugit paasissutissanik naapertuuttunik ilaqartoq Inatsisartunut nassiutissavaat.

Aqutsineq

§ 7. § 3, imm. 3 naapertorlugu Inuit Pisinnatitaaffii pillugit Siunnersuisoqatigiinnut ilaasortat Inatsisartut toqqagaasa akornannit, siulittaasussartik namminneq toqqassavaat.

Imm. 2. Inuit Pisinnatitaaffii pillugit Siunnersuisoqatigiit sulinermanni suleriaasissartik namminneq aalajangersassavaat, taannalu siunnersuisoqatigiit nittartagaanni tamanut saqqummiunneqassaaq. Suleriaasissami minnerpaamik makku aalajangersarneqassapput:

- 1) akisussaaffiit aamma inunnut allanut naleeqiullugu pisinnaatitsineq pillugit malittarisassat,
- 2) ilaasortat tunuarnissaannut malittarisassat,
- 3) aningaasatigut missingersuusiorneq, naatsorsuutit kukkunersiuinerlu pillugit malittarisassat, aamma
- 4) suleriaatsip allangortinnissaanut periusissat.

Imm. 3. Siunnersuisoqatigiit minnerpaamik ukiumut marloriarlutik ataatsimiittassapput.

Imm. 4. Pisortat oqartussaasui, pisortat namminersortullu suliffeqarfii, suleqatigiiffiit peqatigiiffiillu attuumassuteqartut naapertuuttut, kiisalu inuit pisinnatitaaffiinut tunngasunik soqtigisallit allat minnerpaamik ukiumut ataasiarluni ataatsimeeqatigineqartassapput.

Allattoqarfik

§ 8. Inuit Pisinnatitaaffii pillugit Siunnersuisoqatigiit allattoqarfimmik pilersitsissapput.

Imm. 2. Allattoqarfik allaffissornikkut suliassanik suliarinnituussaaq Siunnersuisoqatigiinnullu ikiuuttassalluni.

Imm. 3. Siunnersuisoqatigiit allattoqarfimmik sulisunik atorfinititsinissamut soraarsitsinissamullu piginnaatitaapput.

Imm. 4. Atorfinititsinermi atugassarititaasut pissutsillu sinneri, atorfefqarnerup nalaani atugassarititaasut soraarsitaanerillu eqqarsaatigalugit, allattoqarfimmik sulisut aalajangersakkanut

Namminersorlutik Oqartussat qitiusumik allaffeqarfiani sulisunut qaqugukkulluunniit atuuttunut ilaapput.

Imm. 5. Imm. 2 malillugu suliassat aalajangersimasut suliarinissaannut ilinniagalinnik piffissami killilikkami atorfinititsisoqarsinnaavoq.

Kapitali 3

Aningaasalersugaaneq

§ 9. Inuit Pisinnaatitaaffii pillugit Siunnersuisoqatigiit Nunatta Karsianit tapiiffigineqarnikkut aningaasalersorneqassapput.

Imm. 2. Nunatta Karsianit tapiissutitigut makku aningaasalersorneqassapput:

- 1) allattoqarneq,
- 2) siulittaasumut akissarsiarititat,
- 3) ataatsimiinnerit, tamatumunnga ilanggullugit ininut, nutserisoqarnermut, nerisaqarnermut, ullormusianut kiisalu ataatsimiinnermullu atatillugu angalanernut aningaasartuutit, aamma
- 4) paassisutissiinermi ilinniartitsinermilu atortussanut aningaasartuutit.

Imm. 3. Siunnersuisoqatigiit sulinerminnut atugassanik pisortat oqartussaasuinut allanut imaluunniit namminersortut suleqatigiiffiinut, peqatigiiffiinut, suliffeqarfinnut il.il. aningaasanik qinnuteqaateqarsinnaapput.

Imm. 4. Inuit Pisinnaatitaaffii pillugit siunnersuisoqatigiit pillugit suliassamik inatsisitigut aalajangersagaasut iluanni, isertitaqarnermik kinguneqartunik ingerlatsisinnaapput. Isertitat suliassat Siunnersuisoqatigiit inatsisitigut aalajangikkanik suliassaasa isumaginerinut ilaatineqassapput.

§ 10. Inuit Pisinnaatitaaffii pillugit Siunnersuisoqatigiinnut ilaasortat siunnersuisoqatigiit Inatsisartunut aamma Naalakkersuisunut il.il. ilaasortat aningaasarsiaqartitaanerat il.il. pillugit Inatsisartut inatsisaanni malittarisassat malillugit ullormusiaqassapput angalanermullu aningaasartuutinut taarsiivigineqarlutik. Aammattaaq Siunnersuisoqatigiit siulittaasuat siunnersuisoqatigiinni sulinerminut akissarsiaqartinneqassaaq.

Kapitali 4

Missingersuutit naatsorsuutillu

§ 11. Inuit Pisinnaatitaaffii pillugit Siunnersuisoqatigiit ukiut tamaasa kingusinnerpaamik 15. april ukiumut naatsorsuiffiusumut tulliuttumut missingersuutinut siunnersummik Naalakkersuisunut nassiussisassapput.

Imm. 2. Siunnersummumit ilaassapput isertitassatut aningaasartuutissatullu ilimagisaasut missingersuusiiorneri.

Imm. 3. Ilutigisaanik Siunnersuisoqatigiit Nunatta Karsianit ukiumi naatsorsuiffimmi pineqartumi tapiissutissat annertussusissaannik siunnersuuteqassapput.

§ 12. Inuit Pisinnaatitaaffii pillugit Siunnersuisoqatigiit ukiumoortumik naatsorsuutaasa ukioq naatsorsuiffiusoq malissavaat.

Imm. 2. Ukiuumoortumik naatsorsuutit kukkunersiuisumit Nunatta Karsiata ukiuumoortumik naatsorsuutaanik kukkunersiuisartumit kukkunersiorneqassapput.

Imm. 3. Naatsorsuutit kukkunersiukkat tiguneqarneriniit kingusinnerpaamik sapaatip-akunnerisa sisamat qaangiunneranni, Siunnersuisoqatigiit nittartagartik atorlugu taakkku tamanut saqqummiuttassavaat.

Kapitali 5

Ukiuumoortumik nalunaarusiaq aamma naliliinermiit nalunaarusiaq

§ 13. Inuit Pisinnatitaaffii pillugit Siunnersuisoqatigiit ukiut tamaasa kingusinnerpaamik 1. juli, ukiumi qaangiuttumi siunnersuisoqatigiit suliaat, kiisalu suliniutit inuit pisinnatitaaffiinut tunngasut suut pilersaarutigineqarnersut pillugit nalunaarusiortassapput.

Imm. 2. Nalunaarusiaq Siunnersuisoqatigiit nittartagaatigut tamanut saqqummiunneqassaaq. Nalunaarusiaq tamanut saqqummiussinerup ilutigisaanik Naalakkersuisunut, Inatsisartunut kommuninullu nassiunneqassaaq.

Kapitali 6

Atuutilersitsineq ikaarsaariarnermilu aalajangersakkat

§ 14. Inatsisartut inatsisaat manna ulloq 1. januar 2019 atuutilerpoq, taamaattoq tak. imm. 2-3. Ilutigisaanik Inuit Pisinnatitaaffiinut Kalaallit Nunaata Siunnersuisoqatigiivi pillugit Inatsisartut inatsisaat nr. 23, 3. december 2012-imeersoq atorunnaarsinneqarpoq.

Imm. 2. Inuit Pisinnatitaaffiinut Kalaallit Nunaata Siunnersuisoqatigiivi pillugit Inatsisartut inatsisaat nr. 23, 3. december 2012-imeersumi § 3 atuukkallassaaq, Inatsisartut Inuit Pisinnatitaaffii pillugit Siunnersuisoqatigiinnut Inatsisartut inatsisaat manna naapertorlugu ilaasortassanik toqqaanissaasa tungaanut.

Imm. 3. § 3, imm. 3, nr. 6 naapertorlugu siunnersuisoqatigiinnut ilaasortassanik toqqaaneq siullermik taamaallaat ukiuni marlunni atuuttussatut pissaaq.

Namminersorlutik Oqartussat, 27. november 2018

Kim Kielsen